

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINSKI SUD U ZENICI  
Broj: 43 0 St 242794 24 St  
Zenica, 11.3.2025. godine

Općinski sud u Zenici, stečajni sudija Samra Spahić-Drino, u stečajnom postupku nad stečajnim dužnikom Trgovinsko prometno društvo „TOP SPORT“ d.o.o. Kakanj, sa sjedištem na adresi Alije Izetbegovića broj K-15, Kakanj, kojeg zastupa Advokatsko društvo „Hadžimahmutović“ d.o.o. Zenica, matični registarski broj subjekta upisa 43-01-0563-09 (stari broj 1-7391), nakon ročišta održanog dana 17.10.2024. godine u prisustvu privremenog stečajnog upravnika Begagić Jasmina i punomoćnice predlagača Rut Kapin, advokatske pripravnice u Advokatskom društvu „Hadžimahmutović“ d.o.o. Zenica, van ročišta, dana 11.3.2025. godine donio je:

### R J E Š E N J E

Otvara se i zaključuje stečajni postupak nad stečajnim dužnikom Trgovinsko prometno društvo „TOP SPORT“ d.o.o. Kakanj, ulica Alije Izetbegovića broj K-15, Kakanj, matični registarski broj subjekta upisa 43-01-0563-09 (stari broj 1-7391), zbog nepostojanja imovine dovoljne za pokriće troškova stečajnog postupka, te se nalaže brisanje ovog privrednog društva iz sudskog registra zavedenog pod matični registarski broj 43-01-0563-09 (stari broj 1-7391), po pravomoćnosti ovoga rješenja.

### O b r a z l o ž e n j e

Prijedlogom od 08.03.2024. godine predlagač Trgovinsko prometno društvo „TOP SPORT“ d.o.o. Kakanj, podnio je ovom sudu prijedlog za otvaranje stečajnog postupka nad navedenim društvom zbog platežne nesposobnosti stečajnog dužnika.

Rješenjem ovog suda od 09.07.2024. godine pokrenut je prethodni postupak za utvrđivanje uvjeta za otvaranje stečajnog postupka nad navedenim društvom, te je radi utvrđivanja uvjeta za otvaranje stečajnog postupka nad ovim društvom za privremenog stečajnog upravnika imenovan Begagić Jasmin iz Zenice.

Iz izvještaja privremenog stečajnog upravnika, koji je dostavljen sudu 28.08.2024. godine proizilazi da društvo ne posluje pozitivno od 2020. godine, da nema trenutno uposlenih, da prema posljednjem Bilansu stanja iz 2023. godine obaveze stečajnog dužnika iznose 242.769,00 KM koje se odnose na gubitke iz prethodnih perioda, i to najviše po osnovu obaveza prema dobavljačima u iznosu od 241.467,00 KM i to u iznosu 205.467,37 KM prema KM Trade d.o.o. Visoko, 34.000,00 KM prema ASA PVA Sarajevo, 1.252,00 KM prema Bosnet GROUP Sarajevo, 823,12 KM prema JP Grijanje Kakanj, 58,50 KM prema Neosoft Computers Zenica d.o.o., a iznos od 1.302,00 KM odnosi se na ostale obaveze. Dalje je naveo da stečajni dužnik nema obaveza po osnovu indirektnih poreza, kao i po osnovu obaveza na ime javnih prihoda, doprinosa za PIO/MIO, zdravstvo i nezaposlenost, da ima otvoren glavni transakcijski račun kod ASA Banke d.d. broj 143020000008942 koji nije blokiran, da nema pokretne niti nepokretne imovine, da ima robu u vidu zaliha u iznosu od 13.405,00 KM koja je rashodovana i nije pronađena na adresi, da ima potraživanja od kupaca u iznosu od 93.008,00 KM, i to potraživanja prema dužnicima KM Trade d.o.o. u iznosu od 44.655,17 KM, ASA PVA d.o.o. Sarajevo u iznosu od 34.000,00 KM, a koja nisu utužena, te su ista faktički u zastari. U mišljenju je naveo da društvo ostvaruje negativni finansijski rezultat, gubici u poslovanju se akumuliraju, da su se stekli uslovi za otvaranje stečajnog postupka, da je razlog za otvaranje stečajnog postupka platežna nesposobnost stečajnog dužnika, da stečajni dužnik ne izmiruje svoje dospjele obaveze duže od 60 dana, da prijedlog za pokretanje stečajnog postupka nije podnesen u zakonskom roku, te da ne postoji dovoljno imovine da se troškovi namire iz prodaje dijela stečajne mase. Naveo je da smatra da se može otvoriti stečajni postupak, da je on dopušten i da postoji stečajni razlog, ali da imovina stečajnog dužnika nije dovoljna da pokrije troškove stečajnog postupka.

Privremeni stečajni upravnik je na ročištu održanom 17.10.2024. godine ostao u cjelosti kod izvještaja, te je izjavio da stečajni dužnik nema imovine u vidu nekretnina i pokretnih stvari, da su obaveze uglavnom prema dostavljačima u iznosu od 242.769,00 KM, da stečajni dužnik ne posluje od 2020. godine, da već duže vrijeme ne može finansirati tekuće obaveze niti može isplatiti dospjele obaveze prema dostavljačima. U odnosu na drugu imovinu koju stečajni dužnik posjeduje prema bilansu stanja i uspjeha ista se odnosi na potraživanja u iznosu od 93.008,16 KM, koja potraživanja se odnose prema dostavljačima iz poslovnih odnosa sa KM Trade d.o.o., i ASA PVA d.o.o. koja nisu međusobno kompenzirana i koja su u zastari, te se ista ne mogu smatrati izvjesno u naplati. Uvidom u transakcijski račun i izvještaj o računima poslovnog subjekta Centralne banke na dan 28.08.2024. godine, utvrdio je da račun nije blokiran, te da se na istom nalazi oko 500,00 KM. Izjavio je da smatra da ne postoji imovina u bilo kojem obliku dostatna da se pokriju niti djelimični troškovi otvaranja i vođenja stečajnog postupka, te je predložio sudu da postupi u skladu sa odredbama člana 102. stav 7. i 8. Zakona o stečajnom postupku. Na upis suda privremeni stečajni upravnik je izjavio da bi za pokriće troškova stečajnog postupka bio dovoljan iznos od 5.000,00 KM. Punomoćnica predlagača izjavila je da je saglasna sa navodima privremenog stečajnog upravnika, izvještajem i da nema primjedbi.

Sud je donio odluku kao u izreci iz sljedećih razloga.

Odredbom člana 102. stav 6. Zakona o stečaju („Službene novine F BiH”, broj: 53/21) propisano je da stečajni sudija otvara stečajni postupak nad imovinom stečajnog dužnika ako je prijedlog dopušten, ako postoji stečajni razlog i ako će imovina stečajnog dužnika prema predviđanju biti dovoljna da namiri troškove postupka, dok je stav 7. istog člana propisano da ako imovina stečajnog dužnika ne pokriva troškove postupka, a prijedlog je dopušten i osnovan, stečajni sudija će javnim pozivom, objavljenim na oglasnoj tabli suda, web stranici suda - elektronskoj tabli suda i u „Službenim novinama Federacije BiH”, pozvati povjerioce i zainteresirana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka, u iznosu koji odredi stečajni sudija. Stavom 8. istog člana propisano je da ako u roku iz stava 7. ovog člana povjerioci i zainteresirana lica ne predlože otvaranje stečajnog postupka i ne uplate predujam, stečajni sudija će otvoriti stečajni postupak i odmah zaključiti postupak.

Imajući u vidu prethodno navedeno, sud je primjenom odredbe člana 102. stav 7. Zakona o stečaju, rješenjem od 17.10.2024. godine pozvao povjerioce i zainteresovana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka u iznosu od 5.000,00 KM, te da po izvršenoj uplati predujma sudu dostave uplatnicu, kao dokaz da je uplata izvršena. Visina troškova srazmjerno je određena visini troškova koji se očekuju, a koji su neophodno potrebni za otvaranje i vođenje stečajnog postupku.

Rješenje ovog suda od 17.10.2024. godine objavljeno je na oglasnoj tabli suda 24.10.2024. godine, na web stranici suda 23.10.2024. godine i objavljeno je u „Službenim novinama Federacije BiH“ broj: 86od 1.11.2024. godine.

Kako stečajni dužnik ima obaveze, dok nema imovine prema izvještaju privremenog stečajnog upravnika ni za pokriće troškova stečajnog postupka, a povjerioci i zainteresovana lica po proteku roka ostavljenog u rješenju donesenom od strane ovog suda nisu predložili otvaranje stečajnog postupka niti predujmili novčani iznos potreban za pokrivanje troškova stečajnog postupka, to je primjenom odredbe člana 102. stav 8. Zakona o stečajnom postupku, odlučeno kao u izreci ovog rješenja.

Shodno odredbi člana 108. i člana 204. stav 5. Zakona o stečaju, ovim rješenjem određen je upis rješenja o otvaranju i zaključenju stečajnog postupka koje uslijed nedostatka mase prestaje postojati, te brisanje ovog pravnog lica iz sudskog registra.

#### POUKA O PRAVNOM LIJEKU

Protiv ovog rješenja može se izjaviti žalba u roku od 8 dana od dana dostavljanja, Kantonalnom sudu u Zenici putem ovog suda u tri primjerka.

Stečajni sudija

Samra Spahić-Drino, s.r.